



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK



Vogošća, ul. Jošanička br. 80, tel: 00387 33 586-411

P R A V I L N I K

**O SUFINANSIRANJU SPORTSKIH ORGANIZACIJA
SA PODRUČJA OPĆINE VOGOŠĆA**

Vogošća, novembar 2025. godine

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09), čl. 48. Zakona o sportu – prečišćeni tekst („Službene novine Kantona Sarajevo“, br: 45/12) čl. 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24), člana 3. Odluke o finansiranju/sufinansiranju nevladinih organizacija iz budžeta Općine Vogošća ("Službene novine Kantona Sarajevo", br: 19/25) i Odluke o načinu primjene Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik donosi

PRAVILNIK O SUFINANSIRANJU SPORTSKIH ORGANIZACIJA NA PODRUČJU OPĆINE VOGOŠĆA

I OPĆE ODREDBE

Član 1. (Predmet pravilnika)

Ovim Pravilnikom uređuju se uslovi, kriteriji i postupak za dodjelu finansijskih sredstava sportskim organizacijama za sufinansiranje redovnog rada na području Općine Vogošća (u daljem tekstu: Općina).

Član 2. (Ciljevi dodjele sredstava)

Cilj dodjele sredstava ovim Pravilnikom je unapređenje i razvoj sporta, posebno djece i mladih, podrška organizovanom trenažnom i takmičarskom procesu, afirmacija zdravih stilova života i inkluzivnog sporta, prepoznavanje sportskih rezultata koji doprinose promociji Općine.

Član 3. (Značenje pojmova)

Pojedini pojmovi koji se koriste u ovom Pravilniku imaju sljedeće značenje:

- a) Sportska organizacija je pravno lice registrovano u skladu sa zakonom i upisano u odgovarajući registar, kao i u nadležni sportski savez u skladu sa sportskom granom kojom se bavi.
- b) Redovan rad podrazumijeva kontinuirani organizovani trenažni i takmičarski proces, uključujući razvoj sportista i aktivno djelovanje kluba u skladu s pravilima nadležnog saveza.
- c) Pojedinačni i ekipni sportovi određuju se u skladu s klasifikacijom nadležnog sportskog saveza za konkretnu granu sporta.
- d) Inkluzivni sport označava sportsku djelatnost koja omogućava učešće i ravnopravni pristup osobama sa invaliditetom ili drugim posebnim potrebama.
- e) Ženski sport označava organizovani sport u kojem većinu ili značajan dio članova i učesnika čine žene i djevojke, te se podržava ravnopravnost i jednakost u sportskim aktivnostima.

Član 4. (Rodno značenje izraza)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

II PRAVO I NAMJENA SREDSTVA

Član 5.
(Uslovi za prijavu)

Pravo na dodjelu sredstva iz Budžeta Općine po ovom Pravilniku imaju sportske organizacije koje:

- a) su registrovane u skladu sa zakonima Bosne i Hercegovine,
- b) imaju sjedište i aktivno djelovanje na području Općine Vogošća,
- c) su članice odgovarajućeg sportskog saveza,
- d) aktivno djeluju najmanje jednu godinu,
- e) učestvuju u zvaničnim takmičenjima.

Član 6.
(Prihvatljive kategorije troškova)

Sredstva za sufinansiranje sportskih organizacija iz Budžeta Općine se mogu koristiti za:

- a) zakup sportskih objekata za trenažne i takmičarske procese (ukoliko ne finansira drugi nivo vlasti),
- b) obaveze prema sportskim savezima: kotizacije, takse, licence, akreditacije, registracije i članarine.
- c) zvanična domaća takmičenja (troškovi službenih lica – sudije, delegate, zapisničar, doktor, fizioterapeut, obezbjeđenje – zaštitarska agencija, snimatelj, redari, hitna pomoć – vozilo, vatrogasci – vozilo),
- d) zvanična gostujuća takmičenja (putni troškovi – prevoz, smještaj, ishrana),
- e) ljebarske preglede i sportska osiguranja,
- f) nabavku osnovne sportske opreme i rekvizita (u visini do max 20% odobrenih sredstava),
- g) knjigovodstvene usluge i završni obračun

III KRITERIJI ZA RASPODJELU SREDSTAVA

Član 7.
(Bodovni sistem)

(1) Raspodjela sredstava vrši se na osnovu bodovanja prema sljedećim kriterijima:

Kriterij	Maks. bodova
Broj aktivnih članova razvrstano po spolu	20
Rang takmičenja	20
Sportski rezultati - ostvareni u prethodnoj kalendarskoj godini	25
Društveni doprinos (ženski, inkluzivni sport)	10
Kontinuitet rada (godine djelovanja)	15

- (2) Način skaliranja bodova po pojedinim kriterijima iz stava (1) ovog člana precizirat će Komisija za evaluaciju prijava iz člana 13. ovog Pravilnika prije početka evaluacije prijava. Tako utvrđeni način bodovanja postaje sastavni dio dokumentacije o postupku ocjenjivanja i osigurava transparentnost i dosljednu primjenu kriterija.
- (3) Dodatni bodovi, isključivo za postignuća iz prethodnog takmičarskog ciklusa, dodjeljuju se klubovima koji:
 - a) nastupaju za reprezentaciju Bosne i Hercegovine,
 - b) osvajaju jedno od prva tri mjesta na državnim ili međunarodnim takmičenjima,
 - c) učestvuju u najvišem rangu takmičenja (evropska i svjetska takmičenja, olimpijade).
- (4) Dodatni bodovi za kategorije definisane stavom (2) ovog člana su:
 - a) za reprezentativne nastupe: 5 bodova,
 - b) za vrhunski rezultat (plasman među prva tri mjesta): 5 bodova.

Član 8.
(Kategorizacija sportskih organizacija)

Na osnovu ukupnog broja bodova, organizacije se razvrstavaju u tri kategorije:

- a) A kategorija (81–100 bodova) – vrhunski klubovi sa značajnim rezultatima,
- b) B kategorija (50–80 bodova) – uspješni klubovi sa značajnim rezultatima,
- c) C kategorija (30 - 49 bodova) – aktivni klubovi bez značajnih rezultata,
- d) D kategorija (ispod 30 bodova) – razvojni i rekreativni klubovi.

IV RASPODJELA SREDSTAVA

Član 9.
(Finansijski okvir)

- (1) Sredstva se raspodjeljuju proporcionalno ostvarenim bodovima, po sljedećim okvirima:
 - a) do **25% sredstava** za A kategoriju, minimalan iznos po organizaciji je 25.000,00 dok je maksimalan iznos 70.000,00 KM;
 - b) do **45% sredstava** za B kategoriju, minimalan iznos po organizaciji je 15.000,00 dok je maksimalan iznos 60.000,00 KM;
 - c) do **20% sredstava** za C kategoriju, minimalan iznos po organizaciji je 7.000,00 dok je maksimalan iznos 15.000,00 KM;
 - d) do 10 % sredstava za D kategoriju, minimalan iznos po organizaciji je 3.000,00 dok je maksimalna iznos 10.000,00 KM.
- (2) Ukoliko ne bude dovoljan broj prijava u nekoj od navedenih kategorija u stavu (1) ovog člana, na prijedlog Komisije, Općinski načelnik može sredstva Budžeta planirana za ove namjene preusmjeriti na druge kategorija, a u skladu sa brojem prijava pristiglih na javni poziv.

V POSTUPAK PRIJAVE I OCJENJIVANJA

Član 10.
(Javni poziv)

- (1) Sredstva za podršku aktivnostima iz člana 1. ovog Pravilnika dodjeljivat će se na osnovu podnesenih zahtjeva, a u skladu sa objavljenim javnim pozivom.
- (2) Javni poziv se objavljuje na web stranici Općine i ostaje otvoren 30 dana od dana objavljivanja.
- (3) Zahtjevi za sufinansiranje dostavljaju se službi nadležnoj za sport (u daljem tekstu: Služba) preporučeno putem pošte ili putem protokola.
- (4) Sportska organizacija ima pravo podnijeti jednu aplikaciju za kalendarsku godinu za koju aplicira. Ukoliko organizacija podnese više od jedne prijave, iste će se odbaciti kao formalno neprihvatljive.

Član 11.
(Potrebna dokumentacija)

- (1) Uz zahtjev iz člana 10. ovog Pravilnika potrebno je priložiti:
 - a) rješenje o registraciji udruženja (ukoliko je došlo do promjene ili ako nije dostavljen u prethodnom periodu),
 - b) potvrdu o članstvu u sportskom savezu,
 - c) plan i program rada sa finansijskim pokazateljima za godinu za koju se traži finansiranje,
 - d) dokaz o takmičarskom procesu za prethodnu takmičarsku sezonu (potvrda/uvjerenje nadležnog saveza)
 - e) broj registrovanih i aktivnih članova organizacije u prethodnom mjesecu prije objave javnog poziva, uz spisak članova razvrstano po spolu i selekcijama.
 - f) dokaz o nastupima za reprezentaciju članova kluba (potvrda ili uvjerenje nadležnog saveza),

- g) dokaz o ostvarenim rezultatima (potvrda saveza),
- h) uvjerenje o izmirenim poreskim obavezama (original ili ovjerena kopija poreske uprave),
- i) uvjerenje o izmirenim doprinosima za zaposlene, ako ima zaposlenih u organizaciji (ako nema zaposlenih priložiti izjavu da nema zaposlenih),
- j) završni godišnji finansijski izvještaj za prethodnu godinu (bilans stanja i bilans uspjeha),
- k) Izjava o broju članova djece sa poteškoćama u razvoju i djece sa invaliditetom,
- l) broj transakcijskog računa sportske organizacije (ukoliko je došlo do promjene ili ako nije dostavljen u prethodnom periodu).

Član 12. **(Komisija za evaluaciju i bodovanje)**

- (1) Komisiju za evaluaciju i bodovanje prijava (u daljem tekstu: Komisija) imenuje općinski načelnik.
- (2) Komisiju čine predsjednik i dva člana. Sastav Komisije čine: dva državna službenika Općine i jedan predstavnik iz reda sportskih organizacija.
- (3) Člana Komisije iz reda sportskih organizacija predlaže općinska služba nadležna za rad s nevladinim organizacijama i to nakon objavljenog javnog poziva i demokratski provedenog odabira predstavnika sportskih organizacija.
- (4) Nadležna općinska služba na isti način će odabrati i zamjenika predstavnika iz reda sportskih organizacija, kako bi svim organizacijama bilo omogućeno apliciranje na javni poziv, a da članovi Komisije ne bi bili u sukobu interesa.
- (5) Komisija će biti imenovana na period od godinu dana.

Član 13. **(Postupak odobrenja sredstva)**

- (1) Komisija je dužna donijeti Poslovnik o radu Komisije sa kriterijima za skaliranje aplikacija, a u skladu sa članom 7. stav (2) ovog Pravilnika.
- (2) Komisija će, nakon provjere da li projekti zadovoljavaju administrativno-tehničke uslove iz članova 5. i 11. ovog Pravilnika, ocijeniti prijave na način propisan u članovima 6., 7. i 8. ovog Pravilnika.
- (3) Nakon izvršene evaluacije, Komisija dostavlja prijedlog raspodjele sredstva nadležnoj općinskoj službi koja objavljuje preliminarnu listu korisnika.
- (4) Na preliminarnu listu korisnici mogu izjaviti prigovor u roku od 8 (osam) dana od objave liste.
- (5) Po prigovorima rješava Komisija za prigovore koju imenuje općinski načelnik iz reda državnih službenika.
- (6) Nakon rješavanja po prigovorima, Općinski načelnik donosi konačnu Odluku o odabiru korisnika i raspodjeli sredstva koja se objavljuje na web stranici Općine.
- (7) Općinski načelnik sa odabranim korisnicima potpisuje Ugovore o međusobnim pravima i obavezama.
- (8) Odobrena sredstva se isplaćuju kvartalno, uz obavezu da sportska organizacija dostavi polugodišnji izvještaj za dodjeljena sredstva, a prije uplate trećeg kvartala.
- (9) Sportske organizacije su u obavezi narativni i finansijski (godišnji) izvještaj dostaviti najkasnije do kraja januara naredne godine.

VI IZVJEŠTAVANJE I NADZOR

Član 14. (Obaveze korisnika sredstava)

- (1) Sportske organizacije su dužne Općini dostavljati polugodišnje i godišnje izvještaje o utrošku sredstva. Izvještaj podrazumjeva narativni (opisni) dio i finansijski izvještaj sa relevantnom dokumentacijom koja dokazuje namjenski utrošak sredstva (izvod iz banke, uplatnica, račun/faktura).
- (2) Sportske organizacije dužne su čuvati dokumentaciju i omogućiti uvid i kontrolu od strane Općine u bilo kojem trenutku tokom trajanja projekta.

Član 15. (Obustava finansiranja)

Općina može isključiti iz finansiranja sportsku organizaciju koja:

- (1) ne dostavi izvještaj u zahtjevanoj formi i u predviđenim rokovima,
- (2) sredstva koristi nenamjenski,
- (3) dostavi lažne podatke,
- (4) prestane sa radom.

VII ZAVRŠNE ODREDBE

Član 16. (Stupanje na snagu)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

Broj: 03-36-1929/25
Vogošća, 14.11.2025. godine

OPĆINSKI NAČELNIK
Migdad Hasanović



Obrazloženje

I Pravni osnov

Pravni osnov za donošenje ovog Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09);
- čl. 48. Zakona o sportu – prečišćeni tekst („Službene novine Kantona Sarajevo“, br: 45/12) kojim je utvrđen javni interes u oblasti sporta u jedinicama lokalne samouprave.
- 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) kojim je određena nadležnost Općinskog načelnika za donošenje pojedinačnih i općih akata iz samoupravnog djelokruga općine.
- član 3. Odluke o finansiranju/sufinansiranju nevladinih organizacija iz budžeta Općine Vogošća ("Službene novine Kantona Sarajevo", br: 19/25) koji je definisana obaveza Općinskog načelnika za donošenje provedbenih akata
- Odluka o načinu primjene Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, kojom je propisana način i obim primjene Smjernica, a u skladu sa specifičnostima lokalne zajednice.

II Razlozi donošenja

Donošenje Pravilnika o sufinansiranju sportskih organizacija na području Općine Vogošća ima za cilj unaprijediti transparentnost, pravičnost i sistematičnost u raspodjeli budžetskih sredstava namijenjenih razvoju sporta. Pravilnikom se prvi put jasno definišu kriteriji, uslovi i postupci za dodjelu sredstava, čime se osigurava jednaka dostupnost sredstava svim sportskim organizacijama koje djeluju na području Općine.

Poseban fokus stavljen je na podršku radu sa djecom i mladima, razvoju ženskog i inkluzivnog sporta, kao i na vrednovanje sportskih rezultata i reprezentativnog statusa sportista. Time se želi potaknuti veći angažman klubova u radu sa mladima, afirmacija zdravih stilova života i jačanje sportskih potencijala Općine.

Pored toga, Pravilnikom se uvodi i jasna obaveza izvještavanja i nadzora nad utroškom sredstava, što predstavlja značajan doprinos u smislu efikasnog i odgovornog upravljanja javnim resursima. Ovaj akt je i obavezan korak u implementaciji smjernica o minimalnim standardima dodjele budžetskih sredstava, a sve u skladu sa principima dobrog upravljanja i važećim pravnim aktima.

III Finansijska sredstva

Sredstva za sufinansiranje rada sportskih klubova obezbjeđuju se u Budžetu Općine Vogošća.